

Kap 盲朋友 唱聖詩

► 林俊育 | 台語工作者

雙連教會西羅亞合唱團成立已經 20 年，每
拜一 kap 拜五 ê 早起 10 點到 12 點，團
員放落按摩工作來教會練唱。In 先背點字譜，
koh 再背點字歌詞，然後合做伙來練唱。二十年來，in 四界用詩歌見證上帝 ê 疼，感動 chiok-
chē 人。

幾 nā 百條 ê 歌譜 kap 歌詞記 tiâu tī in ê 頭
殼內，無指揮 koh 無樂譜，鋼琴伴奏就是 in ê
指揮。受國內外邀請去詩歌見證，超過一千場
次，「西羅亞」就是「奉差遣」ê 意思，團員
無嫌艱苦，因為 in 心內充滿上帝 ê 疼，in 所
見證--ê 是約翰福音第九章3節——耶穌應講：
「Chit-ê 人無犯罪，伊 ê 父母 mā 無，是 beh
通過伊來顯明上帝 ê 作為。」（現代台語譯
本）。

以前點字歌詞需要義工來報讀，chit 種義

工 jú 來 jú oh choē，我就架設思羅安信望愛網
站（<http://sloan.fhl.net>），kā 台語聖經 kap 台語
聖詩歌詞上網，hō in 方便下載來印點字週報。

感謝台語聖詩即時伴奏創作人李瑞雄長
老，提供所有台語新舊版聖詩 ê 伴奏 mp3 檔
案，網站頂面聖詩每一首有台語點字歌詞加
伴奏。我就緊去雙連教會盲人幹事許梅芳 ê 辦
公室報伊 chit-ê 消息，伊歡喜 kah 隨上網講：
「咱來唱 275 首，我 siōng 愛唱至好朋友就是
耶穌 lah。」阮做伙 kā chit 首 ùi 頭到尾唱完，
她笑 bún-bún 講：「真好 sng! 『好好玩』
oh!」這是我一生 siōng 歡喜 ê 時刻，我深深體
會--tiòh：「疼就是 tī 別人 ê 需要上，看 tiòh 家
己 ê 責任。」